

SAMÞYKKT

um afgreiðslur skipulags- og byggingarnefndar Kjósarhrepps.

1. gr.

Byggingarfulltrúi Kjósarhrepps fer með verkefni sem mælt er fyrir um í lögum nr. 160/2010 um mannvirki og ákvæðum í þeim reglugerðum sem settar eru á grundvelli laganna, þar á meðal útgáfu byggingarleyfa.

2. gr.

Skilyrði fyrir útgáfu byggingarleyfis af hálfu byggingarfulltrúa samkvæmt III. kafla laga um mannvirki er að skipulags- og byggingarnefnd hafi samþykkt útgáfuna, en skipulags- og byggingarnefnd annast verkefni byggingarnefndar, sbr. samþykkt um stjórn og fundarsköp Kjósarhrepps, nr. 852/2010, með síðari breytingum, og 7. gr. laga um mannvirki.

3. gr.

Byggingarfulltrúi skal hafa samráð við skipulags- og byggingarnefnd um hvert það mál sem hann telur að varði verksvið nefndarinnar.

Byggingarfulltrúi skal leita samþykkis skipulags- og byggingarnefndar áður en byggingarleyfi er veitt, varði breyting á mannvirki útlit þess og form nema breyting sé óveruleg, sbr. 5. mgr. 9. gr. laga um mannvirki.

4. gr.

Um málsmeðferð gilda að öðru leyti ákvæði sveitarstjórnarlaga, nr. 138/2011, laga nr. 160/2010 um mannvirki, skipulagslaga nr. 123/2010, samþykktar um stjórn og fundarsköp Kjósarhrepps, nr. 852/2010, og stjórnarsýslulaga, nr. 37/1993, eftir því sem við á.

5. gr.

Samþykkt þessi sem hreppsnefnd Kjósarhrepps hefur sett samkvæmt ákvæðum 7. gr. laga um mannvirki, nr. 160/2010, staðfestist hér með til að öðlast þegar gildi.

Umhverfis- og auðlindaráðuneytinu, 2. maí 2013.

F. h. r.

Steinunn Fjóra Sigurðardóttir.

Hafsteinn Pálsson.